

# Berita-berita Ringkas Dari Alam Islami

**Parlimen Sudan** telah bersetuju memecat al-Sayyid Muhammad Mahgoub dari jawatannya sebagai Perdana Menteri Sudan pada bulan Julai 1966 yang lalu. Sewaktu undi dijalankan didapati 126 suara bersetuju di atas pemecatan tersebut, yang tidak bersetuju hanya 30 suara sahaja. Berhubung dengan pemecatan tersebut maka al-Sayyid Muhammad Ahmad Mahgoub terpaksa meletakkan jawatannya di hadapan al-Sayyid Ismail al-Azhari Ketua Majlis Tertinggi Kerajaan Sudan, yang mana perletakan jawatan itu telah pun dipersetujui.

Kemudian al-Sayyid Ismail al-Azhari pun mengadakan suatu perundingan dengan al-Sayyid Sadiq al-Mahdi – Ketua Parti Rakyat Sudan – hasil dari perundingan tersebut al-Sayyid Ismail al-Azhari telah bersetuju melantik beliau menjadi Perdana Menteri dan meminta kepada beliau supaya menyusun sebuah jemaah menteri yang baru.

\* \* \*

**Kerajaan Tunis** pada tanggal 25 Julai 1966 yang lalu telah mengadakan sambutan memperingati hari ulangtahun yang kesembilan berdirinya Republik Tunis.

\* \* \*

**Kerajaan ‘Arabiyyah Sa‘udiyyah** dan **Kerajaan al-Kuwayt** telah bersetuju menetapkan sempadan di antara kedua buah negeri. Persetujuan tersebut telah

ditandatangani di Taif oleh al-Shaykh Isa al-Abdul Latif, al-Abdul Jalil (Duta al-Kuwayt di ‘Arabiyyah Sa‘udiyyah) dan al-Sayyid Muhammad Ibrahim Masood wakil Kementerian Luar Kerajaan ‘Arabiyyah Sa‘udiyyah.

\* \* \*

**Kerajaan Syria** telah mengugut akan memutuskan perhubungannya dengan Persatuan Bangsa-bangsa (U.N.O) setelah melihat kepada kegagalan persatuan dunia itu mencegah Israel daripada mengadakan serangan-serangan di sempadan bumi Syria dengan secara bermahrajalela. Inilah kali yang terakhir sekali kerajaan Syria memajukan pengaduannya di dalam soal tersebut kepada Persatuan Bangsa-bangsa itu.

\* \* \*

**Kerajaan Pakistan** dengan rasminya telah menerima usul daripada kerajaan India bagi mengadakan satu sidang peringkat menteri dengan tujuan untuk mencari penyelesaian damai yang telah berkesan di antara kedua-dua buah negeri yang sedang bersengketa itu.

\* \* \*

Beberapa buah syarikat kebangsaan dan sebuah syarikat perniagaan Iran di ‘Arabiyyah Sa‘udiyyah telah meminta kebenaran daripada Menteri Wakaf Saudi hendak menghadiahkan permaidani-permaidani tenunan negeri Iran yang terbaik sekali kepada Masjid Nabawi di Madinah Munawwarah. Permintaan ini dibuat setelah pengurus syarikat-syarikat tersebut mendapat

tahu bahawa Kementerian Bahagian Haji dan Wakaf telah bercadang hendak mengganti permaidani-permaidani lama yang berada di dalam masjid yang mulia itu dengan permaidani-permaidani yang baru dengan perbelanjaan semilion pound.

\* \* \*

**Satu permesyuaratan** mengenai hubungan perniagaan di antara kerajaan Sharq al-Urdun dengan kerajaan Turki telah diadakan baru-baru ini di Kota Amman ibu negeri al-Urdun. Beberapa cadangan yang mengenai bertukar-tukar barang dagangnya yang diusulkan oleh kedua buah negeri itu telah mencapai detik persetujuan yang memuaskan kedua belah pihak.

\* \* \*

**Sebuah badan untuk menyelidiki** harta benda kepunyaan orang-orang Arab yang berada di bumi Israel telah dibentuk di Kota Amman pada bulan yang lalu. Anggota-anggota badan penyelidik tersebut terdiri daripada beberapa orang sarjana ilmu bumi Arab yang terkemuka. Tujuan badan penyelidik itu dibentuk ialah untuk mengkaji dengan secara jelas tentang berapa banyak harta benda kepunyaan orang-orang Arab di bumi Palestin yang telah dirampas oleh orang-orang Yahudi.

Hasil daripada kajian tersebut akan dihantarkan kepada Persatuan Bangsa-bangsa di New York.

\* \* \*

**Kementerian Haji dan Hal Ehwal**

**Agama** kerajaan ‘Arabiyyah Sa‘udiyah telah bersetuju meruntuhkan bangunan Makam Ibrahim yang berada di dalam Masjid-il Haram Makkah sekarang, makam tersebut akan digantikan dengan bangunan baru yang diperbuat daripada kaca, bentuknya lebih kecil dari makam yang ada sekarang. Langkah-langkah ini dibuat ialah dengan tujuan untuk menyenangkan orang-orang haji bergerak di sekeliling Kaabah sewaktu mereka mengerjakan tawaf, dengan kerana bangunan yang baru ini mengambil tempat yang kecil.

\* \* \*

**Kerajaan ‘Arabiyyah Sa‘udiyah** telah mulai mengadakan latihan-latihan mubaligh Islam di beberapa buah negeri di Asia dan Afrika. Latihan-latihan itu meliputi pelajaran bahasa Inggeris. Golongan-golongan mubaligh yang pertama yang akan dihantar bertugas di merata-rata negeri dijangka akan dimulai pada tahun 1967.

\* \* \*

**Lebih dari 50,000 orang tahanan politik** dan jenayah telah diampunkan dan dibebaskan dari penjara-penjara di Turki di bawah undang-undang baru pengampunan baru yang diluluskan oleh parlimen dan ditandatangani oleh Presiden Cevdet Sunay pada 7 Ogos yang lalu.

\* \* \*

**Menteri Luar Negara negara Arab yang dijadualkan akan mengadakan persidangannya pada bulan September 1966** di Algeria dan bercadang bagi mengadakan badan pertahanan bersama Arab telah dibatalkan. Sebaliknya *Arab League* akan mengadakan persidangannya di Kaherah pada bulan September.

Gamal Abdel Nasser adalah menjadi

punca batalnya persidangan itu kerana ia dan suku-sakatnya tidak mahu menghadirinya.

\* \* \*

**Mustafa Amin**, bekas pengarang Harian *al-Akhbar* di Kaherah telah dijatuhan hukuman penjara seumur hidup oleh Mahkamah Tinggi Keselamatan Negara atas beberapa tuduhan-tuduhan termasuk bersabahat dengan sebuah kerajaan asing. Mustafa Amin berumur 53 tahun.

\* \* \*

**Sharifuddin Pirzada**, **Menteri Luar Pakistan**, di dalam ucapannya pada 10 Ogos 1966 di Karachi menyatakan langkah-langkah India bersiap kepada perperangan. Sebanyak dua kumpulan askar-askar 21 ketumbukan tentera India menghadap ke Pakistan. India juga mempunyai lain pasukan tentera mengandungi sembilan ketumbukan, termasuk ketumbukan kereta-kereta senjata, sebagai persediaan. Pasukan kapal terbang India ada tiga belas skuadron daripada jenis *supersonic* yang boleh membawa peluru berpandu selain daripada jenis kapal terbang lain.

\* \* \*

India telah membeli 600 kereta kebal dari Eropah Timur, 400 buah meriam-meriam besar dan 200 kereta kebal pengangkut dan 200 buah kapal terbang *supersonic* yang membawa peluru berpandu.

\* \* \*

Tidak lama lagi India akan menerima kapal selam-kapal selam. Kapal-kapal pendarat pun sudah disampaikan kepada India dan 50 buah kapal terbang laut dibeli dari Eropah Barat.

India telah menaikkan belanjawan perangnya dari 920 milion rupee 1947/48 kepada 11000 rupee bagi tahun kemudiannya.

\* \* \*

**Kerajaan ‘Arabiyyah Sa‘udiyah** telah memutuskan akan menanam pokok-pokok sepanjang jalan di antara Makkah dengan Jeddah yang jauhnya 42 batu itu.

\* \* \*

**President Somali** yang telah melawat kerajaan ‘Arabiyyah Sa‘udiyah di dalam kenyataan bersamanya pada 11 Oktober 1966 telah bersama-sama menyeru untuk mengadakan sidang kemuncak Islam “bagi mengadakan persefahaman dan persatuan seluruh umat Islam dan kerajaan.”

\* \* \*

**Negara-negara yang menyambut seruan** mengadakan sidang kemuncak Islam yang dianjurkan oleh Jalālah al-Malik Faisal ialah: ‘Arabiyyah Sa‘udiyah, Iran, Jordan, Morocco, Tunis, Sudan, Somali dan Pakistan.

Yang menentang: Republik Arab Bersatu, Iraq, Syria, Algeria, Yaman dan Turki.

Yang berkecuali: Lubnan dan Kuwait.

\* \* \*

Ketua rombongan mahabbah Indonesia yang melawat kerajaan ‘Arabiyyah Sa‘udiyah pada 15 Ogos 1966 menyatakan di Jeddah bahawa kerajaan Indonesia menyokong seruan Jalālah al-Malik Faisal untuk mengadakan sidang kemuncak Islam itu. Kerjasama dan persatuan umat Islam adalah dikehendaki oleh tiap-tiap umat Islam dan kerajaan Islam.